



*Komuna e Podujevës * Opština Podujevo * Municipality of Podujevo*

KUVENDI

Në bazë të nenit 3.1 pika II, nenit 4.1 të Rregullores së UNMIK-ut për vetëqeverisjen e komunave në Kosovë nr. 2000/45, dhe nenit 18.1 pika p të Statutit të komunës, Kuvendi i Komunës i Podujevës, në mbledhjen e mbajtur më 18.07.2007, miratoi këtë :

RREGULLORE

PËR VARREZAT, MIRËMBAJTJEN E TYRE DHE SHËRBITET E VARRIMIT NË TERRITORIN E KOMUNËS SË PODUJEVËS

I. DISPOZITAT E PËRGJITHSHME

Neni 1

Me këtë Rregullore përcaktohet mënyra e rregullimit të varrezave, mirëmbajtja e tyre dhe shërbimet e varrimit në territorin e komunës së Podujevës.

Rregullimi dhe mirëmbajtja e varrezave është veprimtari komunale me interes të përgjithshëm.

Neni 2

Përkufizime

Shpjegime të kuptimeve të fjalëve që përdoren në këtë rregullore:

Varr - vendi për varrosjen e trupit të vdekur.

Varrim - vendosja e kufomës në varr.

Varrezë – është toka e caktuar për varrim, e përcaktuar sipas planit urbanistik të qytetit.

Biznes - person juridik i cili mirëmban varrezat.

Shërbimet e varrimit - shërbimet të cilat kryhen gjatë procedurës së varrimit.

Shfrytëzuesi i vend-varrit - person i cili përkujdeset për vend-varr.

Leje për zhvarrosje - leje të cilën e lëshon Kuvendi i Komunës për zhvarrosjen e të vdekurit.

Çmimi i varrimit - çmim i propozuar nga biznesi dhe i aprovuar nga KKP për mirëmbajtje dhe shërbime të varrimit.

Prehja – pushimi shpirtëror i të vdekurit.

Dinjitet - tërësia e vlerave morale të të vdekurit

Përfitues – Subjekti i përzgjedhur për menaxhimin dhe mirëmbajtjen e varrezave.

Person - person juridik ose person fizik.

DUSHPA - Drejtoria për Urbanizëm, Shërbime Publike dhe Ambient.

KKP - Kuvendi i Komunës i Podujevës.

II. RREGULLIMI DHE MIRËMBAJTA E VARREZAVE

Neni 3

Rregullimi dhe mirëmbajtja e varrezave nënkupton rregullimin dhe mirëmbajtjen e objekteve dhe mjeteve të cilat shërbejnë për kryerjen e shërbimeve të varrimit, rregullimin dhe mirëmbajtjen e rrugëve, aleve dhe hapësirave ndërmjet varreve, mirëmbajtja e gjelbërimit, rendit dhe pastërtisë, largimi i borës dhe akullit, përgatitja e hapësirës për varrim si dhe kryerja e punëve tjera të cilat janë të lidhura me rregullim dhe mirëmbajtje të varrezave e varreve në veçanti.

Neni 4

Në qytet si dhe në vendbanimet tjera në territorin e Komunës, duke pasur parasysh se jetojnë pjesëtarë të konfesioneve të ndryshme, mund të jenë në përdorim dy ose më shumë lokacione për varreza.

Neni 5

Toka (lokacioni) për varreza në qytet caktohet në përputhje me Planin urbanistik të qytetit, ndërsa në vendbanime tjera, në territorin e Komunës, në përputhje me planin hapësinor.

Para caktimit të vendit (lokacionit) për varreza duhet pasur kujdes veçanërisht në mbrojtjen e burimeve dhe puseve prej nga banorët furnizohen me ujë, në mbrojtjen e ajrit si dhe mbrojtjen e kushteve të posaçme sanitare për ndërtimin e varrezave.

Neni 6

Lokacioni i varrezave caktohet me vendim të Kuvendit të Komunës.

Neni 7

Në bazë të Planit urbanistik dhe projektit të varrezave, hapësira në varreza e dedikuar për varrosje, ndahet në parcela në brendi të cilave ndodhen vendet për varrim të cilat evidentohen me numra.

Biznesi është i obliguar që të udhëheq dhe evidentojë ngastrat dhe vendet e varrit me emrin e personave të vdekur, datën e varrimit si dhe shërbimet tjera të lidhura me varrim.

Neni 8

Varrezat rrethohen me rrethojë metalike (në lartësi prej 2 m). KKP është i obliguar që në afat prej dy vitesh nga dita e hyrjes në fuqi të kësaj Rregulloreje të bëjë rrethimin e varrezave të qytetit.

Mjetet e nevojshme për ndërtim dhe rregullim të rrethojës sigurohen nga buxheti i Kuvendit dhe burimeve tjera (donator të mundshëm).

Neni 9

Kuvendi i Komunës , bazuar në procedurën e përcaktuar me Ligjin për prokurim përzgjedh përfituesin i cili do të jetë përgjegjës për menaxhim dhe mirëmbajtje të varrezave të qytetit.

Përfituesi kryen shërbime sipas dispozitave të kësaj Rregulloreje në përputhshmëri me çmimin e propozuar nga biznesi përmes DUSHPA dhe të aprovuar nga Kuvendi i Komunës i Podujevës.

Neni 10

Rregullimi dhe mirëmbajtja e varrezave bëhet në bazë të programit vjetor të cilin e propozon biznesi, e të cilën e miraton Kuvendi i komunës i Podujevës.

Përkujdesje të veçantë Kuvendi Komunal do t'i kushtojë varrezave të dëshmorëve.

Programi nga paragrafi 1 i këtij neni përmban: llojin, masën, dinamikën e punëve, si dhe shumën e mjeteve të nevojshme për realizimin e tyre.

Përfituesi është i obliguar që Drejtorisë për Inspeksion t'ia paraqes planin për mirëmbajtje të zbërthyer në muaj për vitin vijues, më së largu 10 ditë pas miratimit të programit nga paragrafi 1. Planet harmonizohen me programin e aprovuar nga KKP.

Neni 11

Me mirëmbajtjen e vendeve të varrit përkujdesën shfrytëzuesit, familja e afërt dhe farefisi. Rregullimin dhe mirëmbajtjen e varrit, shfrytëzuesit mund t'ua besojnë përfituesit i cili mbikëqyrë varrezat.

Neni 12

Përfituesi gjatë mirëmbajtjes duhet domosdo t'iu përmbahet rregullave dhe projektit të varrezave.

Ndërtimet mbi varre lejohen në format, përmbajtjet dhe madhësitë e njëjta, të përcaktuara nga DUSHPA, mbi bazën e propozimit paraprak të Këshillit të Bashkësisë Islame në Podujevë.

Ndryshimet eventuale mund t'i bëjë biznesi vetëm me pëlqim të DUSHPA dhe me miratimin e KKP.

Neni 13

Të drejtat dhe përgjegjësitë e biznesit përcaktohen me kontratë të veçantë.

Neni 14

Për vendosjen, riparimin si dhe zhvendosjen e pllakave dhe mjeteve tjera në vendet e varrit është i obligueshëm pëlqimi i përfituesit.

Për ndërmarrjen e çfarëdo pune në lapidarë (pllakë përkujtimore) ose ndonjë pjese në varr ose varrezë, e cila ka karakterin e lapidarit kulturor, është i nevojshëm pëlqimi me shkrim nga institucioni i cili merret me mbrojtjen e monumenteve kulturore.

Përfituesi është i obliguar që ta informojë Drejtorinë për Inspeksion për ekzekutimin e punëve pa pëlqim nga paragrafi 1 dhe 2 të këtij neni.

Neni 15

Aktivitetet zejtare në varr, për të cilat është siguruar pëlqimi bazuar në nenin 14 të kësaj Rregulloreje kryhen duke i respektuar këto kritere :

Në ditë pune, gjatë aktiviteteve mbahet rendi dhe qetësia në varreza.

Materiali ndërtimor (rëra, cementi, etj) është i lejuar të mbahen në varreza për një kohë sa më të shkurtër e cila është e nevojshme për kryerjen e punëve e që mos të jetë pengesë për lëvizjen e vizitorëve. Pas mbarimit të punëve ekzekutuesi është i obliguar që menjëherë të bëjë pastrimin e vendit ku janë bërë punët.

Transporti i materialit të bëhet vetëm në rrugët dhe aletë të cilat i përcakton biznesi.

Nëse gjatë kryerjes së punëve gjinden arkivole dhe gjëra të tjera, punët duhet të ndërpriten dhe menjëherë duhet lajmëruar biznesi.

Nëse gjatë kryerjes së punëve gjinden mjetet me vlerë menjëherë duhet dorëzuar biznesit.

Përfituesi mund të ndërpresë punët në varreza apo në një pjesë të varrezave në kohë të caktuara të ditës, apo në ditë të caktuara.

Ekzekutuesve të punëve të cilët nuk iu përmbahen dispozitave të këtij neni, udhëzimit për respektimin e rendit në varreza, biznesi ua ndalon aktivitetin ndërtimor në varreza.

Neni 16

Përfituesi është i obliguar të mënjanoj të gjitha mjetet dhe të mbjellat të cilat janë të vendosura pa pëlqim. Shpenzimet për punët e ndërmarra do të jenë në ngarkesë të shfrytëzuesit të varrit.

Neni 17

Në varreza është e lejuar mbjellja e luleve dekorative të rritjes së ulët të cilat nuk pengojnë varret tjera për rreth.

Drunjtë e mbjellë nga Kuvendi i Komunës mund të mënjanohen, krasiten vetëm me pëlqim nga DUSHPA.

Neni 18

Përfituesi që menaxhon me varreza të qytetit është i obliguar, që:

Aktivitetet të jenë në pajtueshmëri me projektin e aprovuar për rregullim të varrezave.

Në bazë të projektit dhe përpunimit detaj urbanistik të bëjë përcaktimin e vendeve për varrim.

Të mirëmbajë rrugët, aletë, hapësirën ndërmjet varreve.

Të kujdeset për mirëmbajtjen dhe mos dëmtimin e rrethojës.

Përkujdesje të veçantë t'iu kushtojë varrezave të dëshmorëve.

Në fund të çdo viti kalendarik të hartojë planin e punëve për vitin e ardhshëm, dhe si propozim t'ia dorëzojë Drejtorisë për Urbanizëm, Shërbime Publike dhe Ambient, gjegjësisht Kuvendit për miratim.

Qytetarëve t'ua jep në shfrytëzim vendin e lirë në varreza në pajtim me këtë rregullore

Të kryej shërbime në lidhje me varrimin dhe transportin e eshtrave (transporti, gërmimi).

Të mbaj librin amë të varrimit, posaçërisht për secilin varr, me përshkrim të hollësishëm të vendit (ngastrës së varrimit).

Të mbaj evidencën e varrezave, lapidarëve, etj.

Të mbajë evidencën e bartësit të së drejtës së shfrytëzimit të vendit-ngastrës së varrimit

Të mbajë evidencën e ngastrës së varrimit.

Të mbajë evidencën e varrezave të qytetarëve të merituar.

Të kryej punë tjera në mirëmbajtje, rregullim dhe mbrojtje të varrezave të cilat do të përcaktohen me kontratë.

III. VARRIMI

Neni 19

Me varrim nënkuptohet varrosja e të vdekurit, përkatësisht vendosja e eshtrave të kufomës në vendet e caktuara.

Varrosja bëhet pasi të jetë konstatuar vdekja e përcaktuar me dispozita ligjore.

Neni 20

Pas konstatimit të vdekjes nga ana e mjekut, familja, përkatësisht personi që përkujdeset për varrosje është i obliguar që në afat prej tre orësh ta njoftojë biznesin për vdekjen e personit me qëllim të organizimit të bartjes dhe varrosjes në varreza të qytetit.

Organizimin komplet të varrimit, që nga bartja e bën përfituesi që menaxhon me varreza.

Neni 21

Përfituesi është i obliguar që bartjen e kufomës (që ka ndërruar jetë jashtë institucioneve shëndetësore) ta sigurojë çdo ditë në kohën 00 deri 24. Bartja duhet të bëhet të njëjtën ditë kur nga ana e mjekut është konstatuar vdekja.

Neni 22

Përfituesi është i obliguar që të sigurojë çdo ditë personelin për shërbime të varrimit.

Personeli i cili bënë varrimin duhet që të ketë veshjen përkatëse të cilën e përcakton përfituesi.

Neni 23

Vendi për varrim i jepet në shfrytëzim farefisit të të ndjerit dhe atë: bashkëshortit të të ndjerit, të ndjerës, (me kurorë, jashtë-kurorës) fëmijës(legjitim apo të falur) prindit të të ndjerit.

Nëse nuk ka shfrytëzues nga paragrafi 1 i këtij neni vendi i varrit i jepet në shfrytëzim farefisit më të gjerë.

Kuvendi i Komunës do t'i mbulojë shpenzimet (sigurojë) e varrimit për qytetarët të cilët nuk kanë farefis dhe nuk kanë qenë nën përkujdesjen e askujt.

Përrjashtimisht nga paragrafi 1 dhe 2 vendi i varrit i jepet në shfrytëzim personit i cili siguron varrimin e të ndjerit.

Neni 24

Në qytet kufoma bartet për në varr me arkivol (tabut), nga të afërmit dhe farefisi apo nga përfituesi me mjete të caktuara motorike për këtë qëllim.

Shfrytëzuesit e vendit të varrit janë të obliguar të bëjnë kompensimin për shfrytëzim, mirëmbajtje për çdo vit në pajtueshmëri me çmim të miratuar nga KK.

Neni 25

Të drejtat dhe përgjegjësitë në mes të shfrytëzuesve dhe përfituesit rregullohen me kontratë, e cila lidhet menjëherë ose më së voni brenda gjashtë muajve prej ditës së varrimit të të ndjerit.

Kontrata nga alineja 1 e këtij neni lidhet në afat të caktuar.

Vendi i varrit që është dhënë në shfrytëzim nuk mund të jepet në qarkullim.

Neni 26

Në rast të vdekjes së shfrytëzuesit e drejta për shfrytëzim bie në personin fizik i cili është pasardhës i tij.

Nëse janë disa persona si pasardhës, personat janë të obliguar të përcaktojnë shfrytëzuesin i cili duhet të dorëzojë dëshminë nga gjyqi, në të kundërtën këtë person do ta përcaktoj përfituesi i cili menaxhon me varreza.

Neni 27

Varrosja bëhet në pajtim me dispozitat përkatëse sanitare dhe fetare duke respektuar dinjitetin e të vdekurit.

Kufoma e të vdekurit nuk mund të zhvarroset, bartet nga varrezat ekzistuese para skadimit të afatit të obligueshëm sanitar.

Afati i obligueshëm sanitar i fillimit gjerë të hapja e varrit (zhvarrosja) është së paku 10 vjet.

Neni 28

Mihja dhe mbushja e varrit, përkatësisht mbyllja e varrit në varreza të qytetit bëhet nga përfituesi, ndërsa në vendbanimet tjera këto punë u besohen bashkë familjarëve të ndjerit ose personave tjerë.

Neni 29

Eshttrat e kufomës të cilit i ka skaduar afati obligues i prehjes nuk mund të zhvarrosen në intervalin kohor prej 1 majit deri me 30 shtator.

Neni 30

Bashkë me kërkesën për varrim ose bartje të eshtrave të kufomës, paraqitësi i kërkesës është i obliguar të paraqesë dëshminë mbi pëlqimin e bashkë familjarëve më të afërt të të ndjerit ose personit të autorizuar për shfrytëzimin e varrit.

Për bartjen e eshtrave nga një varr në tjetrin, nevojitet leja e përfituesit e lëshuar konform lejes së lëshuar nga Drejtoria për Inspeksion-inspeksioni sanitar, bazuar në dispozitat ligjore që rregullojnë këtë lëmi.

Pas mbarimit të ceremonisë së varrimit, përkatësisht varrosjes, personeli që ka kryer punët është i obliguar që vendin e varrit ta rregullojë sipas dispozitave të kësaj rregulloreje.

Neni 31

Varrosja e kufomës së të ndjerit bëhet në varrezën e cila është në shfrytëzim të rregullt.

Përgjysimisht jashtë varrezave të cilat janë në përdorim mund të bëhet varrimi vetëm me lejen e organit kompetent të administratës komunale dhe të bashkësisë fetare përkatëse.

Vendi për varrim jashtë varrezave në përdorim të rregullt përcaktohet me plan urbanistik.

Neni 32

Nëse në varrezat ekzistuese nuk ka vend për varrim për shkak të zgjerimit të vendbanimit, për arsye sanitare ose varrezat ekzistuese nuk i përgjigjen kushteve, Kuvendi i Komunës bie vendim se varrezat e tilla pushojnë të jenë në funksion të përdorimit.

Vendimin nga alineja 1 e këtij neni Kuvendi i Komunës e bie në bazë të të dhënave të komisionit të posaçëm profesional.

Neni 33

Varrezat të cilat karakterizohen si varreza jashtë përdorimit pas skadimit të afatit për përdorim, mund të shndërrohen në park ose brez gjelbërimi me vendim të veçantë nga KKP.

Shfrytëzuesit e vendvarrimeve të varrezave të tilla për kohën e mbetur, kanë drejt shfrytëzimi në një vendvarrim tjetër.

Neni 34

Varret mund të jenë për person ose varre familjare.

Në varret për person varroset vetëm një person, kurse në varret familjare, varrosen më shumë të afërm të gjakut, me kusht që thellësia e varrit deri në skajin e sipërm të arkivolit të jetë së paku 0,90 m.

Biznesi që menaxhon me varreza mund të lejojë varrimin në një varr të eshtrave të personit të vdekur që nuk bën pjesë në radhën e personave nga alineja 1 e këtij neni me kërkesë ose në marrëveshje me personat që gëzojnë të drejtën e shfrytëzimit.

IV. RENDI NË VARREZA

Neni 35

Në varreza mbahet rendi dhe qetësia absolute.

Përfituesi është i obliguar që të sigurojë mbajtjen e rendit dhe qetësisë absolute në varreza.

Neni 36

Varrezat janë të hapura për vizitorë çdo ditë pune dhe atë për periudhën prej:

1 prill deri me 30 shtator prej orës 07.00 deri në orën 19.00.

1 tetor deri më 31 mars prej orës 07.00 deri në orën 18.00.

Përfituesi me pëlqim të DUSHPA në raste të jashtëzakonshme dhe të arsyeshme, përkohësisht mund të bënë ndalesën e vizitorëve në varreza.

Neni 37

Vizitorët, shfrytëzuesit e vendvarrimit janë të obliguar t'i përmbahen urdhëresës, udhëzimeve të cilat i japin personat e autorizuar të biznesit.

Vizitorët janë të obliguar që të mbajnë qetësi gjatë vizitave në varreza e cila u përgjigjet dinjitetit dhe obligimit ndaj të ndjerëve.

Neni 38

Përfituesi me akt të veçantë mund të rregullojë kohën e kryerjes së varrimit e cila duhet të jetë konform kësaj Rregulloreje.

Neni 39

Në varreza është e ndaluar:

Hyrja dhe dalja e vizitorëve jashtë kohës kur varrezat janë të hapura për vizitorë.

Hyrja e fëmijëve të moshës nën 10 vjeçare pa përcjelljen e personave të rritur.

Kalimi i rrethojës, shkelja e sipërfaqeve të gjelbëruara, thyerja e drunjve dhe këputja e luleve dhe bimëve tjera dekorative.

Shkelja, njollosja dhe dëmtimi i vendeve të varrimit.

Prishja e qetësisë në varreza.

Futja dhe kullosja e kafshëve në varreza.

Ngasja e biçikletave në rrugë dhe ale, sipërfaqe të gjelbëruara, hedhja e luleve të vyshkura, etj.

Fotografimi me qëllim të kryerjes së shërbimeve komerciale pa lejen e përfituesit.

Shitjen e çfarëdo malli pa lejen e përfituesit .

Aktivitete ndërtimore pa lejen e përfituesit

Montimi i ulëseve, rrethojave nëse nuk janë paraparë me projekt.

Mbjellja e drunjve për rreth varrit pa pëlqimin e përfituesit .

Neni 40

Udhëzimin dhe urdhëresën me të cilën parashihet rendi dhe qetësia sipas nenit 43 të kësaj Rregulloreje, përfituesi është i obliguar që ta vendos në vend të dukshëm në hyrje të varrezës.

V. MJETET E NEVOJSHME PËR KRYERJEN E SHËRBIMEVE

Neni 41

Mjetet për ndërtim, rregullim dhe mirëmbajtje të varrezave sigurohen nga buxheti komunal (nga kompensimi për shfrytëzimin e tokës ndërtimore), mjetet e biznesit që i menaxhon varrezat si dhe nga burimet tjera (donatorët, etj) në përputhshmëri me dispozitat ligjore.

Mjetet për kryerjen e shërbimeve për varrim sigurohen nga çmimi të cilin e paguajnë shfrytëzuesit e së të drejtës për varrim.

Neni 42

Varrimin dhe shërbimet tjera për varrim (transporti i të vdekurit, eshtrave, ruajtja, ceremonitë e varrimit) përfituesi i kryen në bazë të përmbushjes së obligimeve që dalin nga kontrata për shfrytëzimin e vend-varrit. Biznesi në bazë të shërbimeve të planifikuara kalkulon çmimin e shërbimeve të cilin ia propozon Kuvendit të Komunës, përmes DUSHPA për aprovim.

Kompensimi i shërbimeve nga alineja 1 e këtij neni kryhen edhe me rastin e zhvarrosjes së eshtrave të të vdekurit.

Neni 43

Për rregullim, mirëmbajtje të objekteve në varreza, si dhe shfrytëzimin e shërbimeve në varreza (mirëmbajtja e rrugëve dhe aleve, hapësira në mes të vend-varreve, gjelbërimit, ndriçimit publik, rendit dhe pastërtisë), shfrytëzuesi paguan kompensim për shfrytëzim të vend-varrit.

Kompensimi nga alineja 1 e këtij neni përmbushet për periudhën një/pesë/dhjetë vjeçare më së largu në afat prej 30 ditësh nga dita e skadimit të afatit për të cilin është përmbush obligimi.

VI. TË DREJTAT DHE PËRGJEGJËSITË E KUVENDIT TË KOMUNËS

Neni 44

Në raste të jashtëzakonshme kur vjen deri te çrregullimi ose ndalimi i kryerjes së punëve në rregullim dhe mirëmbajtje të varrezave për shkak të “fuqisë madhore”, përfituesi është i obliguar që menjëherë pa hezitim të ndërmerr aktivitete në eliminimin e shkaktarit të çrregullimit dhe atë:

Angazhon personelin që të evitohen shkaqet që çrregullojnë mirëmbajtjen dhe varrimin në varrezë.

Urgjentisht riparon dhe ndërron instalimet dhe mjetet të cilat janë të domosdoshme për kryerjen e punëve, mbron objektet komunale dhe mjetet nga prishjet dhe avaritë tjera.

Ndërmerr masa tjera të cilat i përcakton DUSHPA – sektori për shërbime publike.

Neni 45

Bazuar në alinenë 1 të nenit 44 të kësaj Rregulloreje përfituesi është i obliguar që krahas ndërmarrjes së masave të lajmërojë DUSHPA për shkaqet e çrregullimit – ndalimit si dhe aktivitetet e ndërmarra.

DUSHPA në kuptim të alinesë 1 të këtij neni është e obliguar që menjëherë:

Jep urdhër për mbrojtjen e objekteve dhe pronës komunale të cilat janë të rrezikuara.

Propozon masa për eliminimin e pasojave si dhe masa tjera me qëllim të vënies në shërbim të shërbimeve komunale.

Mund të angazhojë biznes tjetër për kryerje, rregullim, mirëmbajtje të varrezave deri në eliminimin e çrregullimeve.

Vërteton shkaqet, eventualisht përgjegjësitë për çrregullim si dhe përgjegjësin për kompensimin e dëmeve.

Neni 46

Në rast të ndalesës në kryerjen e shërbimeve në rregullim dhe mirëmbajtje të varrezave për shkak të grevës, biznesi është i obliguar që të sigurojë minimumin e punëve të përcaktuar sipas dispozitave të kësaj rregulloreje.

VII. MASAT NDËSHKUESE

Neni 47

Përfituesi i cili menaxhon me varreza për kundërvajtje do të gjobitet prej 500 deri 1.000 € nëse:

Vepron në kundërshtim me nenin 7, alineja 2 të kësaj Rregulloreje.

Vepron në kundërshtim me nenin 10 alineja 1 dhe 3 të kësaj Rregulloreje.
Vepron në kundërshtim me nenin 12 të kësaj Rregulloreje.
Vepron në kundërshtim me nenin 18 të kësaj Rregulloreje.
Vepron në kundërshtim me nenin 19 alineja 2 të kësaj Rregulloreje.
Vepron në kundërshtim me nenin 22 të kësaj Rregulloreje.
Vepron në kundërshtim me nenin 24 alineja 1 të kësaj Rregulloreje.
Vepron në kundërshtim me nenin 25 alineja 3 të kësaj Rregulloreje.
Personi përgjegjës i përfituesit do të gjobitet prej 100-300 € nëse vepron në kundërshtim me alinenë 1 të këtij neni.
Themeluesi i biznesit do të gjobitet prej 300 - 500 € nëse vepron në kundërshtim me alinenë 1 të këtij neni.

Neni 48

Në shumën prej 1.000 deri në 1.500 € do të ndëshkohet personi juridik për kundërvajtje nëse ekzekuton shërbime zejtare të ndaluara sipas nenit 14 dhe nenit 15 të kësaj Rregulloreje, dhe atë:
Nëse nuk siguron pëlqimin me shkrim nga Enti për mbrojtjen e monumenteve kulturore neni 14 alineja 2.
Nëse vepron në kundërshtim me nenin 15 alineja 2.
Personi përgjegjës i biznesit do të gjobitet për kundërvajtje prej 100-300 € nëse vepron në kundërshtim me nenin 15, alineja 1 dhe 2.
Themeluesi i përfituesit do të gjobitet për kundërvajtje prej 300-500 € nëse vepron në kundërshtim me nenin 15, alineja 1 dhe 2.

Neni 49

Personi fizik do të gjobitet prej 100-200 € për kundërvajtje, nëse:
Vepron në kundërshtim me nenin 14 të kësaj Rregulloreje.
Vepron në kundërshtim me nenin 15 të kësaj Rregulloreje.
Vepron në kundërshtim me nenin 25, alineja 3 të kësaj Rregulloreje.
Vepron në kundërshtim me nenin 39 të kësaj Rregulloreje.

Neni 50

Personi juridik do të gjobitet në shumën prej 500 € për kundërvajtje nëse zhvillon aktivitete në varreza pa pëlqimin e përfituesit që menaxhon me varreza.
Ndërkaq personi përgjegjës do të gjobitet me kundërvajtje në shumën 250 €.
Personi fizik 100 € nëse vepron në kundërshtim me nenin 15 të kësaj Rregulloreje.
Personi fizik do të gjobitet në shumën prej 100-250 € nëse vepron në kundërshtim me nenin 39 të kësaj Rregulloreje.
Nëse biznesi nuk kryen obligimet konform alinesë 5 të këtij neni, Drejtoria për Inspeksion-inspeksioni i shërbimeve komunale, do të ngrejë procedurën për kundërvajtje në Gjykatën kompetente në Podujevë.

VIII. DISPOZITAT KALIMTARE DHE PËRFUNDIMTARE

Neni 51

Shërbimet e bartjes së kufomës për në varreza të qytetit i bën përfituesi i cili menaxhon me varreza, ndërsa në fshatra varrimi bëhet sipas traditës.

Neni 52

Për zbatimin e kësaj Rregulloreje përgjegjës janë : Drejtoria për Urbanizëm, Shërbime Publike dhe Ambient -sektori për shërbime publike dhe Drejtoria për Inspeksion dhe përfituesi i cili menaxhon me varreza të qytetit.

Neni 53

Kjo Rregullore hynë në fuqi ditën e miratimit.

Nr. 01-1/144- 02

**Podujevë,
18.07.2007**

**Kryetari
Agim Kikaj**